



## Grupa Bal populer

SËLVA - S. CRISTINA

Volkstanzgruppe  
WOLKENSTEIN - ST. CHRISTINA

Gruppo Ballo popolare  
SELVA - S. CRISTINA

# L bal populer cun n cher' de secul

**Bele 25 ani iel ca da canche Bruno Riffeser dla Vila ova metù su na grupa da bal te Sëlva. Chësta ie dessegur na ucajian da festejé per la lia di jëuni che se à tëüt dant de dé inant la legrëza per l bal tradiziunel**

**Sëlva** - Per vint ani alalongia se tlamova la grupa "Grupa da bal populer de Sëlva" y ova a cë per i prim diesc ani Bruno Riffeser, per i proscimi diesc ani pona Peter Lardschneider. Dan 5 ani, ajache l fova nce truep cumëmbri de Santa Cristina, se à mudà deplù tla grupa y n à ulù ti dé l inuem de tramedoi luesc. L presidënt ie al didancuei Martin Zingerle dl Hotel Jägerheim che nsënia nce i bai. Na gran lauda ulons ti fé a nosc bon sunadëur Diego Colleselli de Corvara, che vën uni venerdì sëira sëura jëuf ca

a proa. La grupa da bal ie pra una dla plu jëunes y atives de dut l Südtirol y à n gran repertoire de bai che va dai plu tradiziunei y storics ai platleri nueves. Ti ultimi ani fej la grupa d'ansciuda, ntan l mëns de mei, n ucajian dl'enes di jëuni na sëira de bal ulache duta la jënt possa uni te sala de chemun a Santa Cristina a balé. Nce la tradizion dla "tlecanocht" ie unida tëuta su coche l fova da vedlamënter cun duta la figures urigineles per l plajëi de truepa jënt che à laudà chësta scumenciadiva.

Per la festa di 25 ani se à la grupa mpensà de mëter a jì n bal che unirà fat n venerdì ai 12 de setëmbër dala 21.00 tla pitla sala dla Cësa de Cultura te Sëlva. L unirà pità da beber per duc y l unirà balà assé. L sunerà la grupa "Tiroler Wind" y l sarà nce na ola dala fertuna cun de beliscimi pesé. La ntreda ie debant, duc ie sambën nviei de cuer. Se ncunferon sun vo, per plu nformazions pudëis vijité la plata internet [www.volkstanzgruppe.org](http://www.volkstanzgruppe.org).

*Andreas Insam*



*La grupa da bal populer de Sëlva y Santa Cristina.*